

FRÁSÖGN

af fundi stjórnarnefndar þings Öryggis- og samvinnustofnunar Evrópu 12. nóvember 2020.

Stjórnarnefnd ÖSE-þingsins fundaði með fjarfundarbúnaði. Af hálfu Íslandsdeildar tóku þátt í fundinum Gunnar Bragi Sveinsson, formaður, og Bylgja Árnadóttir, alþjóðaritari. Á dagskrá voru drög að viðbótarákvæðum við starfsreglur þingsins og starf Matvælaáætlunar Sameinuðu þjóðanna.

David Beasley, framkvæmdastjóri Matvælaáætlunar Sameinuðu þjóðanna, ávarpaði stjórnarnefnd í tilefni þess að stofnunin fékk friðarverðlaun Nóbels árið 2020 fyrir viðleitni sína í baráttu gegn hungri. Í máli hans kom fram að áður en heimsfaraldur kórónuveiru braust út hefðu 130 milljónir manna í heiminum verið á barmi hungursneyðar. Nú væri þessi tala komin upp í 207 milljónir. Hann ítrekaði að öll viðbrögð við faraldrinum þyrfti að vega upp á móti áhrifum þeirra á hungursneyð. Hagkerfi heimsins hefði skroppið saman, ferðaþjónusta dregist saman og peningasendingar brottfluttra til fjölskyldumeðlima í fátækum löndum þurrkast upp. Matvælaáætlun Sameinuðu þjóðanna brauðfæddi 100 milljónir manna á dag. Hann benti á mikilvægi þess að bregðast snemma við skorti á fæðuöryggi. Mun auðveldara og ódýrara væri að þjónusta fólk í neyð í heimalandi þeirra en þegar það væri á faraldsfæti í öðrum löndum. Auk þess skapaði hungursneyð tækifæri til liðsöflunar fyrir hryðjuverkahópa.

Peter Bowness, formaður sérnefndar um starfsreglur og vinnulag ÖSE-þingsins, kynnti drög að nýjum ákvæðum við starfsreglur þingsins um starfsemi þingsins á tímum neyðarástands. Ákvæðin miðuðu að því að hægt yrði að halda ársfund með fjarfundarbúnaði, svo fremi að stjórnarnefnd lýsti yfir neyðarástandi. Einnig yrði stjórnarnefnd falið að ákveða hvort framlengja skyldi skipunartíma embættismanna í slíku neyðarástandi eftir að hann væri liðinn. Enn væri ekki komin fram tillaga um hvernig kosið yrði til embætta í slíkum tilvikum. Viðbótarákvæðin yrðu kynnt framkvæmdastjórn á fundi hennar 2. desember og lögð fyrir stjórnarnefnd til samþykktar í febrúar 2021. Roberto Montella, framkvæmdastjóri ÖSE-þingsins, ítrekaði að ákvörðun um framlengingu skipunartíma forseta og varaforseta í embætti, sem tekin var vorið 2020, hefði verið tekin í samræmi við gildandi starfsreglur.

Roberto Montella tilkynnti stjórnarnefnd að enn væri ekki ljóst hvort forseti þingsins, George Tsereteli, tæki sæti á löggjafarþingi Georgíu í kjölfar kosninga þar í haust. Einnig tilkynnti hann um ráðningu Lamberto Zannier, fyrrverandi fulltrúa ÖSE gagnvart þjóðarbrotum, í ráðgjafastöðu hjá ÖSE-þinginu til að auka sýnileika þingsins. Þá var tilkynnt að ársfundur ÖSE-þingsins árið 2022 færi fram í Birmingham í Bretlandi.

Frekari upplýsingar má nálgast hjá ritara Íslandsdeildar og á vefsvæðinu www.oscepa.org.